



ORDENANTZA 6. ZK

AGURAINGO UDALA ARABAKO LURRALDEA

**ETXEAK EDATEKO UREZ HORNITZEAGATIK ETA
ESTOLDERIAGATIK ORDAINDU BEHARREKO TASA
ARAUTZEN DUEN ORDENANTZA**

I. XEDAPEN OROKORRA

1. artikulua

Udal honek, Arabako Lurralde Historikoko Toki Ogasunak arautzen dituen Foru Arauan ezarritakoari jarraituz, etxeak edateko urez hornitzeko eta estolderia zerbitzuengatik ordaindu beharreko tasa ezartzen eta eskatzen du, ordenantza honen arabera. Ezarri beharreko tarifak jasotzen dituen eranskina ere ordenantzaren zati da.

II. TASA ORDAINTZEKO BETEBEHARRA

2. artikulua

Instalazioak eta zerbitzuak erabiltzen dituztenek daukate ordaintzeko beharra.

III. ZERBITZUA

3. artikulua

Erabiltzaileen edo harpidedunen eta toki-administrazioaren arteko harremanak ekonomiko-administratiboak izango dira, zerbitzuak erabiltzen duen kudeaketa-sistema edozein dela ere, eta herritarren beharrak asetzeko erabiltzen dituen langileak eta instalazioak zerbitzura atxikitzeko era zeinahi dela ere.



4. artikulua

Udalak antolatuko du zerbitzua, eta publizitatea emango dio antolaketa horri; bestalde, izendapen-agiriak emango zaizkie zerbitzura atxikitako langileei, erabiltzaile guztiek ezagut ditzaten eta horren bermea izan dezaten. Zerbitzuaren obrak eta instalazioak jabetza publikoaren ondasunak dira, eta udalari dagokio ondasun horiek inbertsio planen bidez gehitzea. Plan horiek, bestalde, zerbitzuaren uremaria handitzeko izan beharko dute, eta ur horien kalitatea hobetzeko.

5. artikulua

Zerbitzuak ez du izango, inolaz ere, irabazteko xederik, baina mantendu egin beharko da aurrekontuaren oreka, eta hori agintaritzak onartutako tarifa beregainak ezarri egingo da.

IV. HARPIDETZA POLIZAK

6. artikulua

Edateko uraren zerbitzua erabili nahi duen pertsona edo erakunde orok zerbitzuaren bulegora jo beharko du, eta bertan emango diote horniduraren baldintzen berri; interesdunak harpidetza poliza bete beharko du kontsumo mota bakoitzerako propio ezarrita dauden inprimakietan. Horiekin batera honakoak aurkeztuko dira: Eusko Jaurlaritzaren Industria Sailak behar bezala zigilatutako instalazio buletina eta finkaren jabearen baimen idatzia, jabea eta eskaera egin duena pertsona bera ez bada.

7. artikulua

Ez da inolako ur hornidurarik egingo, harik eta erabiltzaileak dagokion harpidetza poliza sinatu arte.

8. artikulua

Zerbitzuak harpidedunekin izenpetuko du beti hornidurak kontratua; hala ere, beharrezko baimenak eman dakizkioke ezinbestekoak diren instalazioak jartzeko, instalazio horiek jarri behar diren finken jabeak edo finka daukatenak harpidedunak ez badira.



9. artikulua

Harpidetza polizak ez du epe mugarik izango, baina erabiltzaileak, zerbitzua utzi nahi izanez gero, baja eman baino hilabete lehenago jakinarazi beharko du hornidura kontratua bukatutzat eman nahi duela.

10. artikulua

Zerbitzuan baja eman ondoren hornidura berriro kontratatu nahi izanez gero, beste harpidetza-poliza bat izenpetu beharko da.

V. HORNIDURA

11. artikulua

Zerbitzuak harpidedunarekin batera ezarriko du —higiezinaren, lokalaren edo urez hornituko den bulegoaren baldintzak kontuan hartuta— zeintzuk izango diren horniduraren gutxieneko ur-emia, instalazioaren neurriak eta ezaugarriak, eta kontagailuaren ahalmena.

12. artikulua

Erabiltzaileak ezin izango du jasotzen duen uraren erabilera aldatu, beste helburu horretarako harpidetza-poliza alde aurretik izenpetu ez badu. Erabiltzaileak ezin izango du, era berean, funtsezko aldaketarik ezarri instalazioaren ezaugarrietan, ezta kontagailua bere kabuz aldatu edo beste batez ordezkatu ere; gainera, ezin izango die urik eman beste pertsona edo erakunde batzuei, ez hornidura banatu harpidedunaren ustezko maizter edo errentarien artean.

13. artikulua

Edateko uraren horniketa honakoa izan daiteke:

1.- Etxeko erabilerarako kontagailua, hau da, elikadurarako eta norberaren garbiketa eta higienerakoa.

2.- Industriako erabilerarako kontagailua:

- a) Ura garbiketarako bakarrik erabiltzen duten industria eta saltokiak.
- b) Ura osagai edo lehengai gisa erabiltzen duten industriak (okindegiak, izotz fabrikak, granjak...), hau da, ura fabrikazio prozesuan erabiltzen dutenak.



3.- Aurrekoetan ez bezalako horniduretan, berdin dio industria erabilerarako zein erabilera publiko edo pribaturako, zerbitzuak proposatuko du kasu bakoitzean (dauzkan datuen arabera) zein den ezarri beharreko ur-emaria, eta emari horren arabera zehaztuko dira dagozkion baldintzak eta tarifak.

14. artikulua

Zerbitzua ez dago behartuta nekazaritzarako ura ematera, ezta lore ustiapenarako, lorezaintzarako edo zuhaitzietarako eta igerilekuetarako ere. Horrelako hornidurarako beharrezkoak diren ur-emari handiak izatekotan, orduan bakarrik baimendu daitezke harpidetzapoliza horiek; kasu horietan, industriarako tarifaren arabera kobratuko da kontsumoa.

15. artikulua

Harpidedunei etengabe eskainiko zaie ur-hornidura. Zerbitzuak ezin izango dio eten ur hornidura harpidedunari, ordenantza honetan ezartzen diren kasuetan izan ezik.

16. artikulua

Aurreko artikuluan ezarritakoari dagokionez, honako hauetan eten ahal izango da hornidura:

- 1.- Hornitzea ezinezko bihurtzen duen matxuraren bat gertatzen bada zerbitzuaren edozein instalaziotan.
- 2.- Ur-emari erabilgarria galtzean edo gutxitzean, horrek urhorniduran, ur-bilketan edo uraren presioan nolabaiteko gabezia sortzen badu.
- 3.- Biztanleria handitzean, baldin eta horrek dauden horniduren eta kontsumo beharren artean desoreka sortzen badu, harik eta hornidura horiek gehitu arte.
- 4.- Hornidura baldintzak hobetzeko beharrezkoak diren instalazioetako obrak, konponketak edo hobekuntzak irauten duten bitartean.

17. artikulua

Zerbitzuak, egoera bakoitzaren larritasunaren arabera, ahalik eta azkarren ohartaraziko die harpidedunei hornidura berehala eten edo murriztuko duela, baita zerbitzua etenda egongo den denbora zehaztu ere. Larrialdi kasu garbietan edo ezinezkoa izan denean utz dezake alde batera zerbitzuak irregulartasunaren berri duen unean bertan ohartarazpena egin gabe; horrelakoetan, gerora egin beharko du, etenaren arrazoiak eta ustez irauten lezakeen denboraren berri emanez.

VI. HARTUNEAK



18. artikulua

Honako hau da ur hartunea: hurbilen dagoen banaketa hoditik hornitu nahi den higiezinera ura eramaten duen adarra. Adar hori ezaugarri bereziak dituen hodi eroale batez hornituta egongo da, hornitu beharreko ur-kopuruaren arabera; ur-hartune bakar batetik horniketa ugari egin daitezke finka berera.

19. artikulua

Adarraren edo hartunearen ezaugarriak, haren instalazioa, zainketa eta mantentze lanak erabiltzaileak kontratatuko ditu zerbitzuarekin, edo higiezinaren egileak edo finkaren jabeak, baina beti egingo da toki administrazioaren aginpide teknikoaren menpean.

Adarra edo hartunea zerbitzuaren ikuskaritza teknikoaren menpean egongo da, eta eskatzailearen kontura izango da. Eraikinak banaketa sarerik ez dagoen eremuetan egiten badira, eta obrak egiteko baimena udalak eman badu, sare berria eskatzailearen kontura izan dadila eska daiteke, baina zerbitzuaren ikuskaritza teknikoaren menpe egin beharko da. Aurrekoa kontuan izanik, hartune guztiek bide publikoan izango dute erregistro-giltza, eta zerbitzuak bakarrik erabili ahal izango du. Giltza hori ezin izango dute erabili ez harpidedunek, ez jabeek ezta hirugarren pertsonak ere. Higiezinaren fatxadetan jarriko da ixteko giltza, eta "irekita" edo "itxita" posizioetan zigilatua egongo da. Debekatuta dago hori erabiltzea, instalazioen barruan matxuraren bat gertatzen denean salbu. Ixteko giltza hausten denean, berehala eman beharko zaio horren berri zerbitzuari; kontrakoa egitekotan, ordenantza honetan eta indarrean dauden xedapenetan ezarritako erantzukizuna eskatuko da.

20. artikulua

Normalean, adar edo hartune bat egongo da finka, eraikin edo higiezin bakoitzari zerbitzua emateko. Higiezinaren zati bateko maizter edo errentari batek hornidura berezi edo banakakoa nahi badu, eta horretarako justifikaturiko arrazoirik badago, jar dezake hartune hori, baina udalak aurretik aldeko txostena eman ondoren.

21. artikulua

Jabeek, eraikitzaileek edo erabiltzaileek pasoko giltzatik aurrera jarriko dituzte instalazioak, hau da, finkaren fatxadatik edo mugatik. Horrela, ur-ihesik egonez gero, ura bide publikora isuriko da, eta ez ditu kaltetuko, ez higiezina, ez barnean dauden jenero edo instalazioak. Barne instalazioen ardura aipatutakoek izango dute.

22. artikulua



Kontratua amaitutakoan edo deuseztatutakoan, adarra libre geratuko da jabearen esku; interesdunak bost egunen buruan adierazi behar dio administrazioari, era frogagarrian, adarra bide publikotik kentzea erabaki duela. Horrela egiten ez badu, adar hori ez zaiola interesatzen ulertuko da, eta udalak egoki iritzitako neurriak hartu ahal izango ditu.

VII. KONTAGAILUAK

23. artikulua

Edateko uraren hornidurarako kontagailuak eraikin edo finka bakoitzaren kanpoko aldean jarriko dira, harpidedun bakoitzeko bat, eta denak toki egokian, erraz iristeko moduko lekuan eta eraikinaren aurrean jarri den ixteko giltzatic ahalik eta hurbilen. Hori horrela izanik, kontagailuak konpartimentu edo kutxa batean egongo dira, bateria deritzon edo antzeko sistema baten arabera; horrela, zerbitzuko langileak erraz apuntatuko ditu kontagailu guztien zehaztasunak egintza bakar batean. Ixteko bi giltzaren artean jarriko dira kontagailuak, matxurarik gertatuz gero, zerbitzuko langileek erraz kendu ahal ditzaten eta berriro jarri. Kontagailutik abiatuta, hartunea zuzenean joango da harpidedunaren instalazioetara, inolako adarrik gabe. Erabat debekatuta dago kontagailu bera harpidedun batek baino gehiagok erabiltzea.

24. artikulua

Udalak erabakiko du harpidedunak erabili behar duen kontagailu mota, haren diametroa eta kokagunea, eta hori harpidedunak polizan jarri duen kontsumoaren arabera egingo da. Benetako kontsumoa eta aitortzen dena bat ez badatoz, udalak kontagailu egokia jartzeko eskatuko dio harpidedunari, eta erabiltzailearen kontura izango da ordainketa.

Legez onartutako sistemetakoak izango dira kontagailu guztiak, eta ipini aurretik Industriako Probintzia Ordezkaritzak egiaztatuko ditu ofizialki. Jarri ondoren, eta nahiz eta erabiltzailearenak izan, zerbitzuko langileek bakarrik erabili ahal izango dituzte; horretarako, behar bezala zigilatuko dira jartzen diren bakoitzean.

25. artikulua

Kontagailua baldintza onetan mantendu behar da, zainduta eta funtzionamendu egoera onean. Udalak beharrezkotzat jotzen duen ikuskaritza oro egin dezake, bai eta egokitzat jotzen dituen konponketak ere. Konponezina den matxuraren bat gertatuz gero, hura aldatzera behartu dezake erabiltzailea.

26. artikulua



Kontagailua harpidedunarena izango da, baina instalazioa udalaren zuzendaritza teknikoaren pean egingo da; matxuraren bat gertatuz gero, zerbitzuak izango du erabiltzeko eta konpontzeko eskumen osoa, baina konponketa harpidedunaren kontura izango da.

27. artikulua

Iruzurra izango da harpidedunak zein udalaren baimenik ez duen pertsona orok egindako edozein manipulazio, dela kontagailuan, dela hartunean dela instalazioetan, baldin eta, ura kontagailutik pasa ez dadin edo egindako kontsumoa behar bezala ager ez dadin, egiten bada.

VIII. BARRUKO INSTALAZIOAK

28. artikulua

Kontagailutik abiatuta, harpidedunak nahi duen eran bana dezake ura bere erabilerarako, eta nahi duen eran egin horretarako lanak, zerbitzuak eskulanean eta beharrezkoak diren materialetan parte hartu gabe; harpidedunak hori egin dezake zerbitzuak instalazioa jartzeko baimena eman behar badu ere hornidura egokia dela bermatze aldera. Bestalde, laguntza eta aholkua eman diezaioke eskatzaileari, edozein gaitan.

Zerbitzuaren ikuskapen teknikoaren pean egongo da barruko banaketa, edozein momentutan zuzen dagoela egiaztatzeko, eta iruzurrak eta kontrataturiko kontsumoan gerta daitezkeen gabeziak saihesteko.

29. artikulua

Harpidetza poliza bakoitzari dagokion barneko instalazioak ezin izango zaizkio lotu beste jatorri bat duen ura banatzen duen beste sare edo hodi bati. Era berean, ezin izango dira uztartu beste harpidetzapoliza bati dagokion instalazioarekin, ez eta udalaren ura berme tekniko edo sanitarioerik –udalaren ustez– ez duen beste batekin nahastu ere.

30. artikulua

Erabiltzaileak, barne banaketarako, andel hartzaileak, erregulatzailak edo erreserbarakoak jar ditzake. Andel horiek txukun eta desinfektaturik mantendu behar dira, eta horiek sor dezaketan kutsaduraren erantzule erabiltzailea izango da. Era berean, ura galtzea saihesteko sistema automatiko edo eskuzkoak edukiko dituzte, nahiz



eta ur hori kontagailuak erregistraturikoa izan; gauzak behar bezala ez zaintzea zerbitzua galaraztea da.

31. artikulua

Era berean, presio ekipoak edo bestelako artikulua teknikoak jar daitezke horretarako ezaugarriak dituzten higiezinetan, baldin eta hartune beretik ura hartzen duten zenbait harpidedunentzako edo barruko instalazio baten zenbait zatirentzako kontsumoa orekatzen laguntzen badute.

Tresna horiek nahitaezkoak izango dira haien garaiera edo beste baldintza berezi batzuk direla-eta edateko uraren hornidura egokia bermatu ezin duten eraikinetan. Edozein prozedura tekniko erabiltzen dela ere, honako hastapen hau bermatu behar da nahitaez: edateko ura kontagailu guztietatik pasatuko dela higiezinaren sarreraren hartunean kokatuta dagoen ixteko giltzatik igaro eta berehala, iruzur egiteko edo zerbitzua oztotatzeko aukerarik egon gabe eta aplikazio horrek sare nagusiko beste ezein harpideduni eragin gabe.

IX. KONTSUMOA

32. artikulua

Harpidedunak harpidetza polizan ezartzen diren baldintzen eta ordenantza honetan horniketari buruz zehaztutakoaren arabera kontsumituko du edateko ura.

33. artikulua

Kontagailuak erregistratzen duena hartuko da benetako kontsumotzat. Kontsumo hori arauzko minimoa baino txikiagoa denean, minimo hori hartuko da kontsumituztat, edozein dela ere kontagailuak markatzen duen zenbakia.

34. artikulua

Kontagailuak matxuraren bat duelako edo ondo ez dabilelako, kontsumitutako ura zenbat izan den ezin bada jakin, aurreko urteko aldi berbereko ordainagiriari zegokion ur-emaria kontsumitu dela joko da eta, horrelakorik egon ezean, azken hiru ordainagiriaren batez bestekoa. Oro har, benetan kontsumitu dena zenbatesteko ahalegina egingo da, baina sistema hori salbuespenezkoa izango da, eta aldi baterakoa. Horrelakoetan, udalari dagokio kontagailua ahal bezain pronto aldatzea, eta erabiltzaileari antzeman dituen akatsak zerbitzuari lehenbailehen jakinaraztea.

35. artikulua



Erabiltzailereren bat kontagailuak erregistratzen duen kontsumoarekin ados ez badago, udalak kontagailua aztertzeko eta egiaztatzeke eskatuko dio Industria Ordezkaritzari. Horren gastuak harpidedunak ordainduko ditu, erregistratutakoa ongi badago; txarto badago, berriz, okerra zuzenduko da.

X. KOBRATU BEHARREKOA

36. artikulua

Kobratzeke kopurua arautzeke, ur kontsumoa eta horren helburua hartuko dira kontuan, ordenantza honetako tarifaren idazpuruetan ezarritakoarekin bat etorritik.

XI. TARIFAK

37. artikulua

Harpidedun bakoitzak kontsumitutakoaren ordainagiria udalak egingo du, agintaritzak une bakoitzean onartutako tarifak zorrozki aplikatuz.

38. artikulua

Ur-kontsumoa edozein dela ere, udalak honako hauek ere kobratuko dizkio harpidedunari: hartuneak egiteke lanak burutu, instalazioak ikuskatu, bide publikoko obrak egin eta lotura eskubideak egitearen ondoriozko tasak eta prezioak, bai eta tarifak izeneko idazpuru orokorraren pean dagokion agintaritzak onartutako gainerakoak ere.

39. artikulua

Eranskinean daude zehaztuta tasa horien tarifak.

40. artikulua

Ur-horniduraren fakturazioa gehienez ere hiruhilekoetan egingo zaio harpidedunari; hala ere, udalak azter dezake, harpidedunarekin batera, ea komeni den epe horiek bat, bi edo hiru hilabeterik behingoak izatea.

41. artikulua

Aldeetako edozeinek eskritura publikoa egiteke eskatuz gero, harpidedunak ordainduko ditu gastuak (udalarentzako benetako kopia barne), bai eta estatuaren, autonomia erkidegoaren, probintziaren edo udalerraren alde sortuta edo sortzeke dauden edozein motatako zerga eta kontribuzioak ere, polizari dagozkionak zein, horren menpe egonik, eranskinetan eta oharretan agertzen diren kontsumoari buruzkoak.



42. artikulua

Harpideduna behartuta dago bere instalazioak nola udalarenak eta kontratatutako ura era egoki eta arrazionalen kontsumitzera, gainerako erabiltzaileei kalterik eragin gabe.

43. artikulua

Udalaren hornidura zerbitzuaren aurkako edozein arau-hauste larri eginez gero, harpidetza-poliza deuseztatu egingo da berehala, eta ur-hornidura eten. Egintza horiek, bestalde, toki ogasunari egindako iruzurra ere izan daitezke.

44. artikulua

Aurreko artikuluan xedatutakoetarako, honako egintza hauek izango dira arau hauste larri:

- 1.- Hitzartutako ur-horniduraz abusatzea, harpidedunaren ohiko jarduerarekin bat ez datozen ur-emariak justifikatutako arrazoirik gabe kontsumituz. Ez da izango justifikatutako arrazoa kontsumoa neurririk gabe handitzea eragiten duen harpidedunaren instalazioetako matxura edo ur-ihesa egotea.
- 2.- Horniduraren erregulartasuna erabilera txarrekin oztopatzea, murrizketen edo hornidura mugatuaren garaietan erabilera horiek beste erabiltzaile batzuen hornidura eragotz badezakete.
- 3.- Urari polizan adierazitakoaz besteko erabilera ematea.
- 4.- Zerbitzuaren baimenik gabe hirugarrenei ura ematea, dela dohainik, dela kostu bidez.
- 5.- Zerbitzuaren ura beste aprobetxamendu batzuetatik ateratzen denarekin nahastea, batez ere nahasketak kutsadura arriskua sortzen duenean.
- 6.- Zerbitzuaren baimenik gabe zerbitzuko langileei ordaintzea, nahiz eta langile horiek harpidedunarentzako lanak egin.
- 7.- Harpidedunaren instalazioak, ur-hartuneak edo kontagailuak dauden lekuetara langileei sartzen ez uztea, baldin eta zerbitzuari iruzur egin zaiola edo zerbitzua eragotzi dela susmatzeko arrazoirik badago.
- 8.- Kontratuaren epea amaitutakoan edo kontratua deuseztatutakoan ura kontsumitzen jarraitzea.
- 9.- Justifikaturiko arrazoirik gabe ixteko giltzak itxi edo irekitzea, zigilaturik egon edo ez.



10.- Instalazioak manipulatzea, benetan kontsumitu den uremaria kontagailuetan erregistratu ez dadin.

11.- Kontsumitu den ura edo edateko uraren kontsumoa eta tasak ordaintzeari uko egitea, justifikaturiko arrazoirik gabe. Justifikatu gabeko arrazoitzat jotzen da ordainketa hiru hilabete baino gehiago atzeratzea, ordaindu beharreko diru-kopuruari edo beste edozein gairi buruzko erreklamazio arrazoituren bat erabakitzeke ez badago.

45. artikulua

Aurreko artikuluan zehaztutakoen larritasunik ez duten ekintza edo arau-haustek indarrean dagoen legeriak baimentzen dituen isun bidez zigortuko ditu udalak.

46. artikulua

Iruzurrei espedientea izapidetuko zaie, izapidetu ere toki administrazioak xedatzen duenaren arabera.

Delitutzat jotzen diren ekintzak, hala nola, zigiluak apurtzea, instalazioak suntsitzea, urak kutsatzea eta Zigor Kodean jasotzen diren beste zenbait, jurisdikzio arruntaren bidez salatuko dira.

47. artikulua

Indarrean dauden legeek xedatzen duten premiamendu probidentzia aplikatuko zaie zordunei.

Edateko uraren hornidura ordaintzeari behin eta berriro uko egiten bazaio, hornidura eten egingo da, legeak horren gainean ezarritakoari jarraikiz.

48. artikulua

Harpideduna izango da neurritz gain kontsumitu duelako hirugarren bati sor diezaiokeen kaltearen erantzule bakarra.

XII. XEDAPEN IRAGANKORRAK

Ordenantza hau indarrean sartzen denean sinatuta dauden kontratuak ordenantzan ezarritakora egokituko dira, eta erabiltzaileak behartuta daude bertan zehazten diren arauak betetzera. Zenbait kasutan, hala ere, zerbitzuak erabaki dezake harpidedunek dituzten aurretiko eskubideak errespetatzea. Edonola ere, eskubide horiek iraungi egingo dira alde aurretik indarrean zegoen kontratu hori amaitzearekin.



Xedapen honen salbuespen gisa, kontagailuak baterian eduki tzeko betebeharra adierazten da.

XIII. AZKEN XEDAPENA

Ordenantza hau eta beraren eranskina behin betiko onartu ziren eranskinean agertzen den egunean eta 2009ko urtarrilaren 1ean sartu da indarrean eta hala jarraituko du aldatu edo indargabetu arte.

**ETXEAK EDATEKO UREZ HORNITZEAGATIK ETA ESTOLDERIAGATIK
ORDAINDU BEHARREKO TASA ARAUTZEN DUEN ORDENANTZA**

Eranskina



Adarrak egitea.- Zerbitzuaren ikuskaritza teknikoaren menpe burutuko da adarra edo ur-hartunea, eta eskatzailearen kontura. Horretarako, espaloian utzi beharko du dagokion ixteko giltza, higiezinaren fatxadaren ondoan, eta hortik aurrera jarraituko du instalazioa jartzen jabeak izendatutako kontratistak edo industrialariak.

Kontagailuaren ezaugarriak.- Kontagailu guztiak izango dira Eusko Jaurlaritzak legez onartutako sistemakoak, eta jarri aurretik ofizialki egiaztaturik egon behar dute.

Jasotzeko multzoak.- Higiezinaren harpidedunari egun bateko kontsumoa bermatzeko besteko neurria duen depositu batetik xurgatuko dute jasotzeko multzoek. Depositua sarreran kontagailu orokorra instalatuko da, kontsumo guztiak erregistratzeko. Zatikako kontsumo guztien batuketak kontsumo orokorraren berdina izan behar du; horrela ez bada, komunitateari egotziko zaio aldea, jasotze multzoaren deposituetako edo flotadoreetako ur galerak edo isuriak izateagatik.

2009KO TARIFAK

URA ESTOLDERIA

	Ura	Estolderia
Etxeak		
- Hiruhileko gutxienera, 21 m ³	6,50 €	5,70 €
- Gutxienera horren gaineko kontsumoak, 30 m ³ arte	0,38 €	0,28 €
- Gutxienera horren gaineko kontsumoak, 30 m ³ eta 40 m ³ bitartean	0,45 €	0,31 €
- Gutxienera horren gaineko kontsumoak, 40 m ³ eta 50 m ³ bitartean	0,50 €	0,36 €
- Gutxienera horren gaineko kontsumoak, 50 m ³ -tik gora	0,67 €	0,41 €
Industriak		
- Hiruhileko gutxienera, 21 m ³	9,30 €	6,45 €
- Gutxienera horren gaineko kontsumoak, 45 m ³ arte	0,54 €	0,35 €
- Gutxienera horren gaineko kontsumoak, 45 m ³ eta 60 m ³ bitartean	0,63 €	0,45 €
- Gutxienera horren gaineko kontsumoak, 60 m ³ eta 100 m ³ bitartean	0,77 €	0,53 €
- Gutxienera horren gaineko kontsumoak, 100 m ³ -tik gora	0,87 €	0,59 €
Hartuneak		
- 1 hazb.-25 mm	683,30 €	
- 1,5 hazb.-40 mm	946,40 €	
- 2,5 hazb.-65 mm	1.414,40 €	
- 3 hazb.-80 mm	1.780,70 €	
- 4 hazb.-100 mm	2.132,00 €	
Hornidurarako altak		
- Hornidurarako alta	143,10 €	
- Horniduraren titularra aldatzea	68,45 €	
Kontagailuak kontserbatzeagatik tasa		



- Etxebizitzak	1,15 €	
- Industriak	6,44 €	

Etxeak edateko urez hornitzeagatik eta estolderia zerbitzuagatik ordaindu beharreko tasa arautzen duen zerga ordenantza, eranskin honetan jasotako tarifak haren zati direla, 2008ko azaroaren 12an onartu zen behin betiko.

E.O
ALKATEA

IDAZKARIA